



PREMIJER(NO) (Ili ko čeka taj i dočeka...)

Ne treba biti previše vidovit pa pogoditi da za ovaj broj nema bolje teme od (ne)vozanja građana Sarajeva. Bilo je mučno, bilo je teško, ali mogu vam reći da je nadasve bilo korisno, a Boga mi i poučno.... Ali ova priča ne počinje sa nelegalnom, nasilnom i nadasve bezobraznom obustavom rada, koja je toliko očito bila politički i motivirana i dirigirana da je to postalo jasno i onima za koje sam već bila izgubila nadu - građanima Sarajeva.

Ali, vratimo se na početak. A on je, vjerovali ili ne, bio u jablaničkom *Granitu*. Ima tome više od tri godine, čini mi se... Tada je, da podsjetim, došlo do "spontanog" protesta radnika, koji su onako usput, napali policiju i stečajnog upravnika, demonstrirali pred sudom (optužujući sadašnjeg glavnog tužioca BiH da je lopov i kriminalac), a sve to, naravno, uz punu podršku *Superhika* i političkih marginalaca - Drugova dvocifrenog broja...

Rezultat - pljačka stečajne mase, dodatno zaduživanje, sudske presude protiv "revolucionara" zbog prilično apolitičnih krivičnih djela kao što je krađa itd.itd...

Nastavak je bio u Živinicama. Radnici *Konjuha*, godinama uljuljkivani demagoškom pričom Drugova, ogrezli u neproduktivnosti, odjednom su se sjetili da bi sve gluposti Drugova na čelu s Drugom Muharemom (čiju sam malenkost ranije spominjala), mogli elegantno fakturisati svima nama, poreskim obveznicima. A rješenje je jednostavno - malo pritisnemo g-dina Džaferovića da da koje milionče i na konju smo. A dok se čovjek za dvije-tri godine sjeti da ga je neko pritiskao, mi smo svakako otišli u propast...

I na kraju, da bi pokazali da je u Sarajevu sve najveće, *GRAS-ovci* su još jednom dokazali da kada god pomislim da ne može gore neko me demantira...

Dakle, oni koji su godinama loše uticali na našu djecu, dokazujući naime da je bolje znati vozati tramvaj i imati rođaka da te tu smjesti, nego učiti školu (dokaz: svaki vozač *GRAS-a*, ima veća primanja od većine inženjera u *Energoinvestu*) su nas počeli vozati, ali više onako virtualno'...

I onda, kao u svakom dobrom trileru dolazi do preokreta - Sarajevo ima, vjerovali ili ne, *Vladu, Premijera i Ministra* koji nemaju manjak muških hormona i koji, kojeg li čuda, ne pristaju na ucjene...

Ili kako rekoh na početku - izgleda dočekasmo....Mašallah!!!! **B**

Aida Delić,
glavna i odgovorna urednica